

《葬馬歌》

葉俊杰

東南有駿馬，銀鬃赤玉軀。
心高志氣壯，疾走競風雷。
一氣絕千里，步步影難隨。
逝將投明主，未遇文王車。
徬徨虛度日，體瘦顏色衰。
余聞復往尋，訪至幽山陲。
奇物竟已逝，空剩骨纍纍。
新墳今既立，低歌吊靈駒。
良友汝莫悲，應知命所催。
才運恆相妨，潔士路崎嶇。
幾世出伯樂，一朝殺子胥。
騷客蛾眉遠，馮唐霜鬢頹。
高枝纏棘蔓，不予鳳凰居！
千古同此況，憔悴雙淚垂？
言畢雙肩抖，胸臆憤難除。
亡者俱往已，生者尤可追。
奠餘進斗酒，忘憂在斯須。

